



REZOLUCIJA 4. KONGRESA

**SOCIJALDEMOKRATSKE PARTIJE BOSNE I HERCEGOVINE
O SARAJEVU, GLAVNOM GRADU BOSNE I HERCEGOVINE**

Polazeći od Programa SDP BiH, usvojenom na III kongresu SDP BiH, 05.02.2005. godine, te polazeći od načela Univerzalne deklaracije o pravu čovjeka, usvojene na Generalnoj skupštini UN u Parizu, 10.12.1948. godine, "Povelji o zaštiti ljudskih prava u gradovima" (Barcelona 1998.) i na osnovu odgovornosti SDP BiH, za razvoj i budućnost bosanskohercegovačkog društva i države, delegati IV kongresa SDP BiH, dana 10.03.2007. godine u Sarajevu, donose

REZOLUCIJU O SARAJEVU GLAVNOM GRADU BOSNE I HERCEGOVINE

U toku stradanja i destrukcije Bosne i Hercegovine, koje su od 1992-1995 . godine, bosanskohercegovačkom društvu i državi nametnuli neprijatelji i protivnici ljudskih, nacionalnih, vjerskih i demokratskih prava i sloboda, grad Sarajevo je, kao opsjednut grad, bio izložen razaranjima neviđenim u bližoj prošlosti civiliziranog svijeta.

Građani Sarajeva, svih nacija, vjeroispovijesti i ubjeđenja, herojski su podnijeli i oduprli se svim stradanjima i time se ubilježili u svjetsku povijest kao istinske patriote svoje zemlje i svog grada.

Stoljećima je Sarajevo bilo glavni grad Bosne i Hercegovine, u vremenu kada se ova zemlja nalazila u sastavu stranih imperija, za vrijeme Kraljevine Jugoslavije, za vrijeme SFRJ i sve do Dejtonskog sporazuma, odnosno do formiranja Kantona Sarajevo.

Od tada grad Sarajevo je sveden na četiri općine, bez stvarnih integracija, bez svoga autohtonog stanovništva, bez zakona koji bi regulirali njegov položaj kao glavnog grada i lišeno je značaja i priznanja koja uživaju glavni gradovi ostalih država. Takav nedefinisan položaj Sarajeva nanosi neopisivu štetu stanovnicima samog grada, cijeloj regiji koja gravitira Gradu, političkoj konsolidaciji bosanskohercegovačkog društva i, svakako, Bosni i Hercegovini kao državi u cjelini.

Zbog toga, SDP BiH se energično zalaže, da se najhitnije, u Parlamentarnoj skupštini BiH donese Zakon o Glavnom gradu BiH Sarajevu, kojim će se jasno definisati teritorija, integracije, unutrašnje uređenje, odnosi prema entitetima i sistem prihoda i finansiranja.

SDP BiH smatra da u teritoriju glavnog grada Sarajeva treba da uđu općine i prostori FBiH i RS koje tradicionalno, ekonomski, kulturno-historijski, komunikacijski i prema interesima stanovništva koje pripada i gravitira gradu Sarajevu.

Reforma statusa Grada Sarajeva mora postati jedan od priznatih prioriteta u okviru strategije ukupnih reformi društva. Glavni grad BiH Sarajevo mora biti uređeno po najvišim civilizacijskim principima zaštite ljudskih, nacionalnih i svih ostalih prava i sloboda, u skladu sa Univerzalnom deklaracijom o pravima čovjek. Tako uređeno Sarajevo će biti primjer i vodilja u preobrazbi, demokratiji i razvoju bosanskohercegovačkog društva u cjelini, kao i same BiH.

Za ostvarivanje ovog cilja neophodno je detaljno razraditi cijeli projekat donošenja Zakona o glavnom gradu, te inicirati izmjene i dopune određenog broja zakona.

Kongres zadužuje Glavni odbor SDP BiH da hitno pristupi izradi detaljnog plana aktivnosti na ostvarenju ovog zadatka.

Kongres zadužuje sve organe SDP BiH kao i svakog člana SDP BiH da se aktivno uključe u provođenje stavova i zadataka koje će utvrditi Glavni odbor SDP BiH, a u cilju što hitnijeg donošenja Zakona o glavom gradu Bosne i Hercegovine Sarajevu.